

INICIJATIVA

za efikasniji mehanizam finansiranja organizacija civilnog društva iz budžeta Federacije BiH

Centar za promociju civilnog društva zajedno sa 71 partnerskom organizacijama civilnog društva (OCD), udruženom u koaliciju „Civilni dijalog“ i drugim OCD, koje djeluju na području Federacije BiH, pokreće Inicijativu za poboljšanje postojećeg mehanizma finansiranja OCD iz budžeta Federacije BiH.

Inicijativu pokrećemo u skladu sa Programom rada Vlade FBiH za 2016. godinu u kojem su, između ostalog, kao strateški ciljevi navedeni jačanje saradnje sa OCD, jačanje budžetske odgovornosti, te jačanje regionalne saradnje i koordinacije između kantona, u skladu sa Odlukom o usvajanju metodologije za transparentno finansiranje projekata OCD po standardima Evropske unije, koju je donijela Vlada FBiH na 103. sjednici 2014. godine (Sl. novine FBiH, 23/14), te na osnovu visokih izdvajanja federalnog Budžeta za ovu namjenu i sve naglašenijih zahtjeva javnosti za transparentno i odgovorno trošenje novca poreznih obveznika.

Saradnja Vlade FBiH sa OCD u provedbi javnih politika, očituje se kroz različite oblike finansijske i nefinansijske podrške, koju Vlada pruža kroz projekte za OCD, a od interesa za opće dobro.

Polazeći od velikog potencijala kojeg pruža međusektorska saradnja u stvaranju pozitivnih promjena za održiv društveni i privredni razvoj FBiH, pokrećemo Inicijativu za poboljšanje pravnog i institucionalnog okvira za finansiranje OCD u FBiH iz javnih izvora.

Osnovni cilj Inicijative je poboljšanje kriterija, mjerila i postupaka, koje nadležna tijela primjenjuju prilikom ugovaranja finansiranja projekata/programa OCD iz javnih izvora, te načina izvještavanja i kontrole njihovog utroška, s ciljem postizanja optimalnih rezultata i učinaka.

Rezultati istraživanja, nalazi izvještaja Ureda za reviziju institucija u Federaciji BiH i naše višegodišnje iskustvo u ovoj oblasti, ukazuju na nedovoljno jasno propisane procedure, nedostatak jasnih, primjenjivih i mjerljivih kriterija za vrednovanje pristiglih zahtjeva/aplikacija i nedostatak nadzora nad trošenjem javnog novca za ove namjene.

Neposredna svrha Inicijative je da se izvrši organizovan i artikulisan pritisak OCD na Vladu FBiH da u najkraćem roku preduzme mjere i korake, koji će stvoriti uslove za poboljšanja u ovoj oblasti.

U realizaciji ove Inicijative spremni smo aktivno saradivati sa Vladom FBiH i pojedinačnim ministarstvima, uz potpuno uvažavanje partnerskog odnosa, uključujući principe uzajamne odgovornosti, te nepristrasnosti i nezavisnosti OCD.

Opredjeljenje za kooperativni pristup u procesu izgradnje međusektorskog dijaloga na nivou FBiH ne isključuje pravo OCD da budu korektiv vlasti i da aktivno zagovaraju javne politike u skladu sa svojom misijom i ciljevima djelovanja.

Pozivamo Vladu FBiH da se prema ovoj Inicijativi očituje s prijedlogom konkretnih mjera i rokova sa ciljem donošenja zvaničnog akta o načinu finansiranja OCD iz javnih izvora u FBiH, u konsultacijama sa zainteresiranim OCD.

Sugerišemo da konkretne mjere u izradi temeljnog dokumenta uključuju elemente Metodologije za transparentno financiranje projekata OCD prema standardima EU:

- konsultacije sa OCD u cilju osiguranja kvalitetnih ulaznih informacija, neophodnih za izradu planskih dokumenata za dodjelu grantova, usmjerenih prema rezultatima, a u skladu sa budžetskim ciklusom;
- utvrđivanje specifičnih i mjerljivih ciljeva i očekivanih rezultata za svaki ciklus dodjele grantova;
- obezbjeđivanje transparentnosti u dodjeli grantova;
- utvrđene kriterije za izbor korisnika grantova i način njihovog vrednovanja, koji će osigurati izbor projekta/programa, čija realizacija doprinosi ostvarenju utvrđenih ciljeva Vlade FBiH;
- osiguravanje jednakog tretmana aplikanata;
- obavezu korisnika grantova da dostave kvalitetne informacije i dokaze o rezultatima i učincima, ostvarenim realizacijom projekata/programa;
- unaprijeđen sistem nadzora, na način da osigura kvalitetne povratne informacije o rezultatima realizacije projekata/programa;
- uspostavljenu praksu vršenja suštinskih i sveobuhvatnih analiza rezultata i učinaka ostvarenih realizacijom projekata/programa;
- redovno izvještavanje Vlade FBiH o učincima grantova na ostvarenje strategijskih ciljeva i opredjeljenja (narativno i finansijsko izvještavanje);
- sprječavanje sukoba interesa.

Izražavamo spremnost i odgovornost da zajedno sa izabranim predstavnicima/ama Vlade FBiH radimo na izradi dokumenta kao i da pružimo svu neophodnu tehničku podršku za organizaciju konsultacija sa OCD u FBiH.